



皇甫冉集卷上

五言古詩

與張補闕王鍊師同舟南下雜題

朝朝春事晚泛泛行舟遠
淮海思無窮悠揚煙景
中幸將仙子去復與故人同
高枕隨流水輕帆任
遠風鐘聲野寺迴草色故城空
送別高臺上徘徊
共惆悵懸知白日斜定是猶相望

屏風上各賦一物得攜琴客

不是向空林應當就盤石
白雲知隱處芳草迷行
跡如何祇役心見爾攜琴客



寄劉方平

坐憶山中人窮棲事南畝煙霞相親外墟落今何
有潘郎作賦年陶令辭官後達生遺自適良願固
無負田取穎水流樹入陽城口歲暮憂思盈離居
不堪久

曾東遊以詩寄之

出郭離言多迴車始知遠寂然層城暮更念前山
轉縱轡越城皋浮舟背梁苑朝朝勞延首徃徃若
在眼落日孤雲還邊愁迷楚關如何淑花發復對
遊子頽古寺杉栝裏連檣洲渚間煙生海西岸雲

見吳南山驚風掃蘆荻翻浪連天白正是揚帆時
偏逢江上客由來許佳句况乃愜所適差我天姥
峰翠色春更碧氣淒湖上雨月淨剡中夕釣艇或
相逢江籬又堪摘迢迢始寧墅蕪沒謝公宅朱槿
攢列墉蒼苔徧幽石顧予任疎懶期爾振羽翮滄
洲未可行須售金門策

崔十四宅各賦一物得簷柳

官渡老風煙尋陽媚雲日漢將營前見胡笳曲中
出復在此簷端垂陰仲長室

送段明府

遙夜此何其霜空殘杳靄方嗟異鄉別蹙是同公
會海林秋更踈野水寒猶大離人轉吳岫旅鴈從
燕塞日夕望前期勞心白雲外

酬楊侍御寺中見招

貧居依柳市間步在蓮宮高閣宜春雨長廊好嘯
風誠如雙樹下豈比一丘中

見諸姬學玉臺體

艷唱召燕姬清絃待盧女由來道姓秦誰不知家
楚傳杯見目成結帶明心許寧辭玉輦迎自堪金
屋貯 作行雲襄王迷處所

題裴二十一新園

東郭訪先生四郊尋隱路久爲江南客自有雲陽
樹已得閒園心不知公府步開門白日晚倚杖青
山暮果熟任霜封籬踈從水渡窮年常牽綴往事
惜淪悞唯見耦耕人朝朝自來去

寄高雲

南徐風日好悵望毗陵道毗陵有故人一見恨無
因獨戀青山久唯令白髮新每嫌持手板時見着
頭巾煙景臨寒食農桑接仲春家貧仍嗜酒生事
今何有芳草遍江南勞心意携手

送張南史

馬卿工詞賦位下年將暮謝客愛雲山家貧身不
閑風波杳未極幾處逢相識富貴人皆變誰能念
貧賤岸有經霜草林有故年枝俱應待春色獨使
客心悲

送薛判官之越

時難自多務職小亦求賢道路無辭遠雲山併在
前樟亭待潮處已是越人煙

賦得簷燕

拂水競何忙傍簷如有意翻風去每遠帶雨歸偏

駛今君裁杏梁更欲年年去

送魏中丞還河北

寧知貴公子本是魯諸生上國風塵舊中司印綬
榮辛勤戎旅事雪下護羌營

又送陸潛夫賦得越山三韻

西陵猶隔水北岸已春山獨鳥連天去孤雲伴客
還祇應結茅宇出入石林間

送竇叔向

楚客怨逢秋間吟興非一葉官守貧病作賦推文
律樵徑未沾霜茅簷初負日今看泛月去偶見乘

皇清詩集卷上
四
潮出卜地會為隣選依仲長室

題高雲客舍

孤興日自深浮雲非所仰窓中 城峻樹外東川
廣晏起簪葛巾間吟倚藜杖阮公道在醉莊子生
常養五柳轉扶踈千峰恣來往清秋香杭穫白露
寒菜長吳國滯風煙平陵延夢想時人趨纓弁高
鳥違羅網世事徒亂紛吾心方浩蕩唯將山與水
處處諧真賞

之京留別劉方年

客子慕儔侶含悽整晨裝邀歡日不足况乃前期

長離袂借嘉月遠還勞折芳遲迴越二陵迴首但
蒼茫喬木清宿雨故關愁夕陽人言長安樂其奈
緬相望

出塞

吹角出塞門前瞻即胡地三軍盡迴首皆灑望鄉
淚轉念關山長行看風景異由來征戍客負得輕
生義

酬裴十四

淮海各聯翩三年方一見素心終不易玄髮何須
變舊國想平陵春山滿陽羨鄰雞莫遽唱共惜良

夜宴

送鄭二員外

置酒竟長宵送君登遠道
羈心看旅鴈晚泊依秋
草秋草尚芊芊離憂亦渺然
元戎辟才彥行子犯
風煙風煙積惆悵淮楚殊飄蕩
明日是重陽登高
遠相望

七言古詩

湖山歌送許鳴謙

并序

夫子隱者也耕於湖山之田
孤雲無心飛鳥無跡
伯仲邕友家人怡怡貞白之風
旁行於澆俗矣始

惠然而去又翻然而歸
春田雪餘具物繁殖結我
幽夢湖間一峯酒而歌歌之以送遠

湖中之山兮波上青桂颼颼兮雨冥冥
君歸兮春早滿山兮碧草晨春暮汲兮心何求
澗戶巖扉兮身自老東嶺西峯兮同白雲
雞鳴犬吠兮時相聞幽芳媚景兮當嘉月
踐石捫蘿兮恣超忽空山寂寂兮潁陽人
旦夕孤雲隨一身

雜言迎神詞二首

吳楚之俗與巴渝同風日見歌舞祀者問其故
荅曰及夏不雨慮將無年復去家有行人不歸憑是

景福夫此二者皆我所懷寄地種苗將成枯草第
爲臺官羈旅京師秉筆爲迎神送神詞以應其聲
亦寄所懷也

迎神

啓庭戶列芳鮮目眇眇心綿絲因風託雨降瓊筵
紛下拜屢加籩人心望歲祈豐年

送神

露霑衣月隱壁氣淒淒人寂寂風迴雨度虛瑤席
來無聲去無跡神心降和福遠客

江草歌送盧判官

江皋兮春早江上兮芳草雜薜蘿兮杜蘅作叢秀
兮欲羅生彼遙隱隰兮經長衍雨中深兮煙中淺
目眇眇兮增愁步遲遲兮堪舉灑之浦湘之濱思
夫君兮送美人吳洲曲兮楚鄉路遠孤城兮依獨
戍新月能分衰露時夕陽照見連天處問君行邁
將何之淹泊汭風日遲處處汀洲有芳草王孫
詎肯念歸期

月洲歌送趙列還襄陽

漢之廣矣中有洲洲如月兮水環流聒聒兮湍與
瀨草青青兮春更秋苦竹林香楓樹樵子及師幾

家住萬山飛雨一川來
巴客歸船傍洲去
歸人不
可遲芳杜滿洲時
無限風煙皆自悲
莫辭貧賤阻
心期家住洲頭定
近遠朝泛輕橈
暮當返不能隨
爾臥芳洲自念天機一何淺

灋水送鄭豐之鄆縣讀書

菱秋中夏涼風起
送君西郊及灋水
孤煙遠樹動
離心隔岸江流若千里
早年江海謝浮名
此路雲
山愜爾情上古全經皆在口
秦人如見濟南生

登山歌

青山前青山後
登高望兩處兩處今何有
煙景滿

川原離人堪白首

無錫惠山寺流泉歌

寺有泉兮泉在山
鏘金鳴玉兮長潺潺
作潭鏡兮澄寺內
泛巖花兮到人間
土膏脉動知春早
隈隩陰深長苔草
處處縈迴石磴喧
朝朝盥漱山僧老
松自新清流活活
無冬春任疏鑿
兮與汲引若有
意兮山中
人偏依佛界通仙境
明滅玲瓏媚林嶺
宛如太室臨九潭
詎減天台望三井
我來結綬未
經秋已厭微官憶舊遊
且復遲迴猶未去
此心祇為靈泉留

送包佶賦得天津橋

洛陽歲暮作征客相望依然一水間相思已如千里隔

晴煙霽景滿天津鳳閣龍

樓映水濱豈無朝夕軒車度其奈相逢非所親鞏樹甘陵愁遠道他鄉一望人堪老君報還期在早春橋邊日日看芳草

廬山歌送至弘法師兼呈薛江州

釋子去兮訪名山禪舟容與兮住仍前猿啾啾兮怨月江渺渺兮多煙東林西林兮入何處上方下方兮通石路連湘接楚饒桂花事久年深無杏樹

使君愛人兼愛山時引雙旌萬木間政成人皆不擾遂令法似性安閒

又送陸潛夫往茅山賦得華陽洞效離騷

體

遊仙洞兮訪真官奠瑤席兮禮石壇忽髣髴兮雲擾杳陰深兮夏寒欲迴頭兮揮手便辭家兮可否有婚嫁兮嬰纏綿歸來兮已久

酬權器

南望江南滿山雪此情惆悵將誰說徒隨群吏不曾聞顧與諸生爲久別聞君靜坐轉耽書種樹葺

茅遠舊居終日白雲應自足明年芳草又何如人
生有懷若不展出入公門猶未免迴舟朝夕待春
風先報華陽洞深淺

五言律詩

潤州南郭留別

縈迴楓葉岸留滯木蘭澆吳岫新紅雨江天正落
潮故人勞見愛行客自無聊君問前程事孤雲入
剡遙

張公洞二首

堯心知稼穡精意遶山川風雨神斯應笙鏞詔命

傳沐蘭祗掃地酌桂佇靈仙拂霧陳金策焚香拜
玉筵

雲開小有洞日出大羅天三鳥隨王母雙童翊子
先何時種桃核幾度看桑田倏忽煙霞散空巖騎
吏旋

巫山峽

巫山見巴東迢迢出半空雲藏神女館雨到楚王
宮朝暮泉聲落寒暄樹色同清猿不可聽偏在九
秋中

長安路

長安九城路戚里五侯家結束趨平樂聯翩抵狹
斜高樓臨遠水複道出繁花唯見相如宅蓬門度
歲華

送朱逸人

時人多不見出入五湖間寄酒全吾道移家愛遠
山更看秋草暮欲共白雲還雖在風塵裏陶潛身
自閒

西陵寄靈一上人

西陵遇風處自古是通津終日空江上靈山若待
人汀洲寒事早魚鳥興情新迴望山陰路中心有

所親

獨孤中丞筵陪餞韋使君赴昇州

中司龍節貴上客虎符新地控吳襟帶才光漢縉
紳泛舟應度臘入境便行春處處歌來暮長江建
業人

送王緒之剡中

不見開山去何時到剡中已聞成竹木更道長兒
童籬落雲常聚村墟水自通朝朝憶玄度非是對
清風

酬李郎中侍御秋夜登福州城樓見寄

辛勤萬里道蕭索九秋殘月照閩中夜天疑海上
寒王程無地遠主意在人安遙寄登樓作空知行
路難

同李司直諸公暑夜南餘館

何處多明月津亭暑夜深煙霞不可望雲樹更沉
沉好是吳中隱仍爲洛下吟微官朝復夕牽強亦
何心

贈普門上人

支公身欲老長在沃州多慧力堪傳教禪功久伏
魔山雲隨坐夏江草伴頭陀借問迴心後賢愚去

幾何

送盧郎中使君赴京

三年期上國萬里自東溟曲蓋遵長道油幢憇短
亭楚雲山隱隱淮雨草青青康樂多新興題詩紀
所經

同李蘇州傷美人

玉珮石榴裙當年嫁使君專房猶見寵傾國衆皆
聞歌舞嘗無對幽明忽此分陽臺千萬里何處作
朝雲

題魏仲光淮山所居

人羣不相見乃在白雲間問我將何適羨君今獨
閑朝朝汲淮水暮暮上龜山幸已安貧定當從鬢
髮斑

送顧長往新安

由來山水客復道向新安半是乘潮便全非行路
難晨裝林月在野飯浦沙寒巖子千年後何人釣
舊灘

送權三兄弟

淮海風濤起江關幽思長同悲鵲遶樹獨作鴈隨
陽山晚雲和雪汀寒月照霜由來濯纓處漁父愛

滄浪

落第後東遊留別

此成方自得何事學干求果以浮名誤深貽達士
羞九江連漲海萬里任虛舟歲晚同懷客相思波
上鷗

寄劉八

東臯若近遠苦雨隔還期閏歲風霜晚山田收穫
遲茅簷燕去後樵路菊黃時平子遊都久知君坐
見嗤

九日寄鄭豐

重陽秋已晚千里信仍稀何處登高望知君正憶
歸還當採時菊定未授寒衣欲識離居恨郊園正
掩扉

劉方平西齋對雪

對酒間齋晚開軒臘雪時花飄疑節候色淨潤簾
幃委樹寒枝弱縈空去鴈遲自然堪訪戴無復四
愁詩

福先寺尋湛然上人相遇

寂然空佇立往往報疎鍾高館誰留客東南二室
峰川原通霽色野色變春容惆悵層城暮猶言歸

路逢

秋夜寄所思

寂寞坐遙夜清風何處來天高散騎省月冷建章
臺鄰笛哀聲急城砧朔氣催芙蓉已委絕誰復可
爲媒

賦得郢路悲猿

悲猿何處發郢路第三聲遠客知秋暮空山益夜
清啾啾深衆木噉噉入孤城坐覺盈心耳倏然適
楚情

清明日青龍寺上方賦得多字

上方偏可適季月况堪過遠近水聲至東西山色
多夕陽留徑草新葉變庭柯已度清明節春秋如
客何

與張諲宿劉八城東莊

人間當歲暮田野尚逢迎萊子多嘉慶陶公得此
生寒蕪連古渡雲樹近巖城雞黍無辭薄貧交但
貴情

問正上人疾

醫王猶有疾妙理競難窮餌藥應隨病觀身轉悟
空地閒花欲雨窓冷竹生風幾日東林去門人待

遠公

送竇叔向入京

冰結楊柳津從吳去入秦徒云還上國誰爲作中
人驛樹同霜霰漁舟伴苦辛相如求一謁詞賦遠
隨身

登石城戍望海寄諸暨嚴少府

平明登古戍徙倚待寒潮江海方回合雲林自寂
寥詎能知遠近徒見蕩煙霄即此滄洲路嗟君久
折腰

和樊潤州秋日登城樓

露冕臨平楚寒城帶早霜時同借河內人是臥淮
陽積水澄天塹連山入帝鄉因高欲見下非是愛
秋光

送孔黨赴舉

入貢列諸生詩書業早成家承孔聖後身有魯儒
名楚水通滎浦秦山擁漢京愛君方弱冠爲賦少
年行

齊郎中筵賦得的的帆向浦留別

一帆何處去正在望中微浦迥搖空色汀迴日落
暉每爭高鳥度能送遠人歸偏似南浮客悠揚無

所依

送陸鴻漸栖霞寺採茶

採茶非採棗遠遠上層崖布葉春風暖盈筐白日
斜舊知山寺路時宿野人家借問王孫草何時泛
椀花

泊丹陽與諸人同舟至馬林溪遇雨

雲林不可望溪水更悠悠共載人皆客離家春是
秋遠山方對枕細雨莫迴舟來往南徐路客爲芳
草留

送李使君赴撫州

遠送臨川守還同康樂侯歲時徒改易今古接風
流五馬嘶長道雙旌向本州鄉心寄西北應此郡
城樓

同樊潤州遊郡東山

北固多陳迹東山復盛遊鏡聲發大道草色引行
騶此地何時有長江自古流頻隨公府步南客寄
徐州

送安律師

出家童子歲愛此雪山人長路經千里孤雲伴一
身水中應見月草上豈傷春永日空林下心將何

物親

溫湯即事

天仗星辰轉霜冬景氣和樹含溫液潤山入繚垣
多丞相金錢賜平陽玉輦過曾儒求一謁無路獨
如何

送薛秀才

雖是尋山客還同慢世人讀書唯務靜無褐不憂
貧野色春冬樹雞聲遠近鄰郝公即吾友知與爾
相親

皇甫冉集卷上

皇甫冉集卷中

五言律詩

酬李司兵直夜見寄

江城聞鼓角
旅宿復何如
寒月此宵半
春風舊歲餘
徒云資薄祿
未必勝閑居
見欲偏舟去
誰能畏簡書

送唐別駕赴郢州

莫歎辭家遠
方看佐郡榮
長林通楚塞
高嶺見秦城
雪向堯關下
人從郢路迎
翩翩駿馬去
自是少年行

送李使君赴邵州

出送東方騎行安南楚人城池春足雨風俗夜迎
神郢路逢歸客湘川問去津爭看使君渡皂蓋雪
中新

故齊王贈承天皇帝挽歌

禮盛追崇日人知友悌恩舊居從代邸新隴入文
園鴻寶仙書祕龍旂帝服尊蒼蒼松裏月萬古此
高原

贈恭順皇后挽歌

徂謝年方久哀榮事獨稀雖殊百兩迓同是九泉

歸詔使歸金策神人送玉衣空山竟不從寧肯學
湘妃

寄鄭二侍御歸新鄭無礙寺所居

何事休官早歸來作鄭人雲山隨伴侶伏臘見鄉
親南畝無三徑東林寄一身誰當便靜者莫使甑
生塵

送廬山人歸林慮山

無論行遠近歸向舊煙林寥落人家少青冥鳥道
深白雲長滿目芳草自知心山色連東海相思何
處尋

送榮別駕赴華州

直到群峰下應無累日程
高車入郡舍流水出關
城草色田家迥槐陰府吏迎
還將海沂詠籍甚漢
公卿

送常大夫加散騎常侍赴朔方

故壘煙霞後新軍河塞間
金貂寵漢將玉節度蕭
關澶漫沙中雪依稀漢口山人知
竇車騎計日勒
銘還

送柳八員外赴江西

岐路窮無極長江九派分
行人隨旅鴈楚樹入湘

雲父在征南役何殊
薊北勲離心不可問
歲暮雪紛紛

又送陸潛夫尋友

登山自補屣訪友不齋糧
坐歌青楓晚行吟白日
長人煙隔水見草氣入林香
誰作招尋侶清齋宿
紫陽

送鄭員外入茅山居

且見全家去寧知幾日還
白雲迎谷口流水出人
間冠冕情遺世神仙事滿山
其中應有物豈貴一
身閒

送志彌師往淮南

已能持律歲復去禮禪亭長老偏摩頂時流尚誦
經獨行寒野曠旅宿遠山青春屬空相望鴻飛已
杳冥

謝韋大夫柳栽

木在胡笳曲今從漢將營濃陰方待庇弱植豈無
情比雪花應吐歲烏葉未成五株蒙遠賜應使號
先生

寄劉方平大谷田家

故山聞獨往樵路憶相從水結泉聲絕霜清野翠

濃籬邊潁陽道竹外少姨峰日夕田家務寒煙隔
幾重

雨雪

風沙悲久戍雨雪更勞師絕漢無人境將軍苦戰
時山川迷向背氛霧失旌旗徒念天涯隔中人芳
草期

送元晟歸潛山所居

深山秋事早歸去復何如裊露收新稼迎寒葺舊
廬題詩即招應作賦是間居別後空相憶嵇康懶
寄書

宿洞靈觀

孤煙靈洞遠積雪滿山寒
松栢凌高殿莓苔封古
壇客來清夜久仙去白雲殘
明日開金籙焚香更
沐蘭

酬盧十一過宿

乞遠方未遂日夕望雲林
况復逢春草何勞問此
心間門公務散枉策故情深
遙夜他鄉酒同君梁
甫吟

奉和對雪

春雲偏當夜暄風却變寒
庭深不復掃城曉更宜

看命酒閑今酌披簑晚未冠
連營鼓角動忽似戰
桑乾

送蕭獻士

惆悵煙郊晚依然此送君
長河隔旅夢浮客伴閒
雲淇土春山直黎陽大道分
西陵儻一弔應有士
衡文

賣藥人處得南陽朱山人書

賣藥何爲者逃名市井居
唯通遠山信因致逸人
書已報還丹効全將世事踈
秋風景溪裏蕭散寄
樵漁

送裴員外往江南

分務江南遠留歡幙下榮楓林綠楚澤水驛到淦
城岸草知春晚沙禽好夜驚風帆幾泊處處暮
潮清

奉和王相公早春登徐州城

落日憑危堞春風似故鄉川流通楚塞山色遶徐
衣壁壘依寒草旌旗動夕陽無戎資上策南畝起
耕桑

奉和對山僧

吏散重門掩僧來閉閣閒遠心馳北闕春興寄東

山草長風光裏鶯喧靜默間芳辰不可往惆悵暮
禽還

奉和待勤照上人不至

東洛居賢相南方待本師旌麾假欲動杯錫杳仍
遲積雪迷何處驚風泊幾時大臣能護法况有故
山期

送康判官在新安賦得江路西南水

不向新安去那知江路長猿聲比廬嶽水色勝瀟
湘驛樹收殘雨漁家帶夕陽何須愁旅泊使者有
輝光

奉和漢祖廟下之作

古廟風煙積春城車騎過方修漢祖寺更使沛童
歌寢帳巢禽出香煙水霧和神心降福處應在故
鄉多

和朝郎中楊子翫雪寄山陰嚴維

凝陰晦長箔積雪滿通川征客寒猶去愁人晝更
眠謝家興詠日漢將出師年聞有招尋興隨君訪
戴船

歸渡洛水

暝色赴春愁歸人南渡頭渚煙空翠合灘月碎光

流豐浦饒芳草滄浪有釣舟誰知放歌客此意正
悠悠

送田濟之揚州赴選

家貧不自給求祿爲荒年調補無高位卑棲屈此
賢江山欲霜雪吳楚接風煙相去誠非遠離心亦
渺然

酬崔侍御期籍道士不至兼寄

一心求妙道幾歲候真師丹竈今何在白雲無定
期崑崙景致絕汗漫往還遲君但焚香待人間到
有時

送劉兵曹還隴山居

離堂徒燕語行子徂悲辛雖是還家路終爲隴上人
先秋雪已滿近夏草初新唯有聞羌笛梅花曲
裏春

同裴少府安吉寺對雨

共結尋真會還當退食初鑪煙雲氣合林葉雨聲
餘溽暑銷珍簟浮涼入綺疏歸心從念遠懷此復
何如

送韋山人歸鍾山所居

逸人歸路遠弟子出山迎服藥顏雖駐耽書癖未

成柴扉度歲月藜杖見公卿更

儒林傳還應有

姓名

徐州送丘侍御之越

時鳥催春色離人惜歲華遠山隨擁傳芳草引還
家北固潮當潤西陵路稍斜縱令寒食過猶有鏡
中花

送陵陳法師赴上元

延陵初罷講建鄴去隨緣翻譯推多學壇場最少
年浣衣逢野水乞食向人煙遍禮南朝寺焚香古
像前

皇朝詩集卷中
賦得海邊樹

歷歷綠荒岸冥冥入遠天每同沙草發長共水雲
聯搖落潮風早離披海雨偏故傷遊子意多在客
舟前

題昭上人房

沃洲傳教後百衲老空林慮盡朝昏磬禪隨坐臥
心鶴飛湖草迥門閉野雲深地與天台接中峰早
晚尋

婕妤怨

由來詠團扇今已值秋風事逐時皆往恩無日再

中早鴻聞上苑寒路下深宮顏色年年對相如賦
豈工

送客

旗鼓軍威重關山去路賒待封甘度隴廻首不思
家城下春山路營中瀚海沙河源雖萬里音信寄
來賒

秋夜宿嚴維宅

昔聞玄度宅門向會稽峰君往東湖下清風繼舊
蹤秋深臨水月夜半隔山鍾世故多離別良宵詎
可逢

送普門上人

花宮難久別道者憶千燈殘雪入林路深山歸寺
僧日光依嬾草泉響滴春冰何用求方便看心是
一乘

五言排律

酬張二仲彝

吳洲見芳草楚客動歸心屈宋鄉山古荆衡煙雨
深艱難十載別羈旅四愁侵澧月通沅水湘雲入
桂林已看生白髮當爲乏黃金江海時相見唯聞
梁甫吟

荅張諲劉方平兼呈賀蘭廣

野性難馴狎荒郊自閉門心閒同海鳥日夕戀山
村屢枉瓊瑤贈如今術存遠峰時振策春雨耐
香源復有故人在寧聞盧鵲喧青青草色綠終是
待王孫

酬包評事壁畫山水見寄

一官知所傲本意在雲泉濡翰生新興群峰忽眼
前黛中分遠近筆下起風煙巖翠深樵路湖光出
釣船寒侵赤城頂日照武陵川若覽名山誌仍聞
招隱篇遂令江海客惆悵憶間田

贈鄭山人

白首滄洲客陶然得此生
龐公採藥去萊氏與妻
行乍見還州里全非隱
姓名枉帆臨海嶠貲酒秣
陵城伐木吳山曉持竿越
水清家人恣貧賤物外
任衰榮忽爾辭林壑高歌
至上京避喧心已慣念
遠夢頻成石路寒花發江
田臘雪明玄纁儻有命
何以遂躬耕

河南鄭少尹城南亭送鄭判官還河東

使臣遠餞席亞尹有前谿
客是仙舟裏途從御苑
西泉聲喧暗竹草色引長
堤故絳青山在新田綠

樹齊天秋聞別鵠關曉待
鳴雞應歎沉冥者年津
路迷

登玄元廟

古廟川原迥重門禁禦連
海童紛翠蓋羽客事瓊
筵御路分踈柳離宮出苑
田興新無向背望久辨
山川物外將遺老區中誓
絕緣函關若遠近紫氣
獨依然

冬夜集賦得寒漏

清冬洛陽客寒漏建章臺
出禁因風徹縈窓共月
來偏將殘瀨雜乍與遠鴻
哀遙夜重城警流年滴

水催閑齋堪坐聽况有故人杯

和鄭少祭中嶽寺北訪蕭居士越上方

肅事祠靈境尋真到隱居
寅緣幽谷遠蕭散白雲
餘晚節持僧律他年著道書
海邊曾狎鳥濠上正
觀魚寂靜求無相淳和覩太初一峰綿歲月萬姓
任盈虛籬隔溪鍾度空臨澗水踈謝公懷舊壑廻
駕復何如

適荊州途次南陽贈何明府

千里獨遊日有懷誰與同言過細陽令一遇朗陵
公清節邁多士斯文傳古風閭閻知俗變原野識

年豐吾道方在此前程殊未窮江天經峴北客思
滿巴東夢渚多愁遠山丘晴望通應嗟出處異流
蕩楚雲中

寄江東李判官

遠懷不可道歷稔勸離憂洛下聞新鴈江南想暮
秋澄清佐八使綱紀案諸侯地識吳平久才當晉
用求時賢幾殖謝摘藻繼風流更有西陵作還成
北固遊歸程限尺牘王事在扁舟山色臨湖盡猿
聲入夢愁

送從弟豫貶遠州

何事成遷客思歸不見鄉遊吳經萬里弔屈過三
湘水與荆巫接山通鄢郢長名嗟黃綬繫身是白
眉良獨結南枝恨應思北鴈行憂來沽楚酒玄髮
莫凝霜

賦得荆溪夜湍送蔣逸人歸義興山

驚湍流不極夜度識雲岑長帶溪沙淺時因山雨
深方同七里路更遂五湖心揭厲朝將夕潺湲古
至今花源若許雖遠亦相尋

太常魏博士遠出賦庭江外相逢因叙其

事

烽火驚戎塞豺狼犯京畿川原無稼穡日月翳光
輝里社扮榆毀宮城騎吏非群生被慘毒雜虜耀
輕肥毀士從芳餌唯君識禍機心同合浦葉命寄
首陽薇耻作織鱗煦方隨高鳥飛山經商嶺出水
泛漢池歸離別霜凝鬢逢迎淚迸衣京華長路絕
江海故人稀秉節身常苦求仁志不違祗應窮野
外耕種且相依

上禮部楊侍郎

郢匠掄材日轅輪必盡呈敢言當一幹徒欲隸諸
生末學慙鄒魯深仁錄弟兄餘波知可挹弱植更

求榮績媿他年敗功期此日成方因舊桃李猶異
載飛鳴道淺猶懷分時移但自驚關門驚暮節林
壑廢春耕十里嵩峰近千秋潁水清煙花迷戍谷
墟落接陽城渺默思鄉夢遲迴知己情勞歌終此
曲還是苦辛行

宿巖維宅送包七

江湖同避地分手自依依盡室今爲客經秋空念
歸歲儲無別墅寒服羨鄰機草色村橋晚蟬聲江
樹稀夜涼宜共醉時難惜相違何事
侶汀洲
忽背飛

送李萬州赴饒州覲省

前程觀拜慶舊館惜招携荀氏風流日胡家清白
齊川迴吳岫失塞濶楚雲低舉目親魚鳥驚心怯
鼓鼙人稀漁浦外灘淺定山西無限青青草王孫
去不迷

送鄒判官赴河南

看君發原隰四牡去皇皇始罷滄江吏還隨粉署
郎海沂軍未息河畔歲仍荒征稅人全少榛蕪虜
近亡所行知宋遠相隔歎淮長早晚裁書寄銀鈞
佇八行

送歸中丞使新羅

詔使殊方遠朝儀舊典行浮天無盡處望日計前程暫喜孤山出長愁積水平野風飄疊鼓海雨濕危旌異俗知文教通儒有令名還將大唐禮方外授諸生

劉侍御朝命許停官歸侍

孟孫唯問孝萊子復辭官幸遂溫清所其甘稼穡難採芝供上藥拾槿奉晨食棟裏雲藏雨山中暑帶寒非時應有筍閒地盡生蘭賜告承優老長筵永日歡

夜集張諲所居得飄字

江南成久客門館日蕭條惟有圖書在多傷鬢髮凋諸主陪講誦稚子給漁樵虛室寒燈靜空堦落葉飄滄洲自有趣誰道隱須招

奉和獨孤中丞遊法華寺

謝君臨郡府越國舊山川訪道三千界當仁五百年巖空騶馭響樹密旌旌連閣影凌空壁松聲助亂泉開門得初地伏檻接諸天向背春光滿樓臺古製全群峰爭彩翠百谷會風煙香象隨僧久祥烏報客先清心乘暇日稽首慕良緣法證無生偈

詩成大雅篇蒼生望已久迴駕獨依然

間居作

多病辭官罷間居作賦成圖書唯藥籙飲食止藜
羹學謝淹中術詩無鄴下名不堪趨建禮詎是厭
承明已輟金門步方從石路行遠山期道士高柳
覓先生性懶尤因疾家貧自少營種苗雖尚短穀
價幸全輕篇詠投康樂壺觴就步兵何人肯相訪
開戶一逢迎

送處州裴使君赴京

使君朝北闕車騎發東方別喜天書召寧憂地脉

長山行朝復夕水宿露爲霜秋草連秦塞孤帆落
漢陽新街趨建禮舊位識文昌唯有

南鴈翔

和袁郎中破賊後經剡中山水

武庫分帷幄儒衣事鼓鼙兵連越徼外寇盡海門
西節比全踈勒功當雪會稽旌旗迴剡嶺士馬濯
靈溪受律梅初發班師草未齊行看佩金印豈得
訪丹梯

送魏六侍御葬

哭葬寒郊外行將何所從盛曹徒列指新墓已栽

皇甫冉集卷中
松海月同千古江雲覆幾重舊書曾諫獵遺草議
登封疇昔輕三事常期老一峰門臨商嶺道窓引
洛城鍾應積泉中恨無因世上逢招尋偏見厚踈
慢亦相容張范唯通夢求羊承絕蹤誰知長卿疾
歌賦不還邛

皇甫冉集卷中

皇甫冉集卷下

七言律詩

三月三日義興李明府後亭泛舟

江南煙景復如何聞道新亭更可過處處執蘭春
浦綠萋萋藉草遠山多壺觴須就陶彭澤時俗猶
傳晉永和更使輕橈徐轉去微風落日水增波

送李錄事赴饒州

北人南去雪紛紛鴈叫汀沙不可聞積水長天隨
遠近荒城極浦足寒雲山從建業千峰遠江至潯
陽九派分借問督郵纔弱冠府中年少不如君

皇朝詩集卷一
酬張二倉曹楊子所居見寄兼呈韓郎中
孤雲獨鶴自悠悠別後經年尚泊舟漁父置詞相
借問郎官能賦許依投折芳遠寄三春草乘興來
看萬里流莫恠杜門頻乞假不堪扶病拜龍樓

玄元觀送李源李風還奉先華陰

此去那知道路遙寒原紫府上迢迢莫持別酒和
瓊液乍唱離歌和鳳簫遠水東流浮落景繚垣西
轉失行鑣華山秦塞長相憶無使音塵頓寂寥

送錢唐路少府赴制舉

公車待紹赴長安客裏新正阻舊歡遲日未能消

野雪晴花偏自犯江寒東溟道路通秦塞北關威
儀識漢官共許郗詵工射策恩榮請向一枝看

使往壽州寄劉長卿

榛草荒涼村落空驅馳卒歲亦何功蒹葭曙色蒼
蒼遠蟋蟀秋聲處處同鄉路遙知淮浦外故人多
在楚雲東日夕煙霜那可道壽陽西去水無窮

同溫丹徒登萬歲樓

高樓獨上思依依極浦遙山合翠微江客不堪頻
北顧塞鴻何事復南飛丹陽古渡寒煙積瓜步空
洲遠樹稀聞道王師猶轉戰誰能談笑解重圍

宿淮陰南樓酬常伯能

淮陰日落上南樓喬木荒城古渡頭浦外野風初入戶窓中海月早知秋滄波一望通千里畫角三聲起百憂佇立分宵絕來客煩君步履忽相求

酬李補闕

十年歸客但心傷三徑無人已自荒夕宿靈臺伴煙月晨趨建禮遂衣裳偶因麋鹿隨風草謬荷鴛鸞借末行縱有諫書猶未獻春風拂地日空長

送崔使君赴壽州

列郡專城分國憂彤檐皂蓋古諸侯神華遇主年

猶少公瑾論兵位已酬草色青青宜建隼蟬聲處處雜鳴騶千里相思如可見淮南木落早驚秋

館陶李丞舊居

盛名天下挹餘芳弃置終身不拜郎詞藻世傳平子賦園林人比鄭公鄉門前墜葉浮秋水籬外寒皋帶夕陽日日青松成古木祇應來者爲心傷

奉和彭祖井

上公旌節在徐方舊井莓苔近寢堂訪古因知彭祖宅得仙何必葛洪鄉清虛不共春池竟盥漱偏宜夏日長聞道延年如玉液欲將調鼎獻明光

送袁郎中破賊北歸

優詔親賢時獨稀
中途紫綬換征衣
黃香省闥登朝去
楊僕樓船振旅歸
萬里長聞隨戰角
十年不得偃郊扉
但將詞賦奉恩輝

秋日東郊作

閒看秋水心無事
臥對寒松手自栽
廬嶽高僧留偈別
茅山道士寄書來
燕知社日辭巢去
菊爲重陽冒雨開
淺薄將何稱獻納
臨歧終日自遲迴

送張道士歸茅山謁李尊師

向山獨有一人行
近洞應逢雙鶴迎
常以素書傳

子弟還同白石號
先生無窮杏樹行
時種幾許芝田向
月耕師事少君年
歲久欲隨旄節往
層城

五言絕句

同諸公有懷

舊國迷江樹
他鄉近海門
移家南渡久
童稚解方言

題畫帳二首

山水

桂水饒楓杉
荆南足煙雨
猶疑黛色中
復是雒陽岨

遠帆

朝見巴江客暮見巴江客雲帆儻暫停
路陽臺夕

渡汝水向太和山

落日事牽陟西南投一峰誠知秋水淺但怯無人蹤

秋怨

長信多秋氣昭陽借月華那堪閉水巷聞道選良家

門柳

接影武昌城分行漢南道何事閉門外空對青山老

遠山

少室盡西峰鳴皋隱南面柴門縱復關終日窓中見

南澗

上路各乘軒高明盡明玉寧知澗下人自愛輕波淥

春早

草徧潁陽山花開武陵水春色既已同人心亦相

似

山館

山館長寂寂閒雲朝夕來空庭復何有落日照青苔

同張侍御詠興寧寺經藏院海石榴花

蓮
嫩葉生初茂殘花少更鮮結根龍藏側故欲竟青

送王司直

陽
西塞雲山遠東風道路長人心勝潮水相送過尋

婕妤怨

長
花枝出建章鳳管發昭陽借問承恩者雙蛾幾許

題盧十一所居

門
春風來幾日先入辟疆園身外無餘事閒吟晝閉

山半橫雲

中
湘水風日滿楚山朝夕空連峰雖已見猶念長雲

病中對石竹花

散點空堦下間疑細雨中那能久相伴嗟爾滯秋風

送王翁信還剡中舊居

海岸耕殘雪溪沙釣夕陽客中何所有春草漸看長

送陸邃潛夫

并序

頃者江淮征鎮屢有掄材之舉子不列焉有司之過予方耕山釣湖避人如逃寇徒欲羅高鴻捕深魚窮年竭日其可得也今齒髮向暮執勞無力衆雛嗷嗷開口待哺如有知者子其行乎無爲自苦

一絕賦長道

高山迥欲登遠水深難渡杳杳復漫漫行人別家去

楊氏林亭探得古槎

千年古貌多八月秋濤晚偶被主人留那知來近遠

和王給事禁省梨花詠

巧解逢人笑還能亂蝶飛春風時入戶幾片落朝衣

酬李判官度梨嶺見寄

隴首怨西征嶺南鴈北顧行人與流水共向閩中去

送遠客

行隨新樹深夢隔重江遠迢迢風日間蒼茫洲渚晚

臺頭寺願上人院古松下有小松栽毫末
新生與纖草不辯重其有凌雲干霄之志
與趙八員外裴十補闕同賦之

細草亦全高秋毫乍堪比及至干霄日何人復居此

清明日漁子溝寄趙員外裴補闕

欲逐淮潮上暫停漁子溝相知望不見終是屢迴頭

初出沉江夜入湖

放溜出江口迴瞻松栝深不知舟中月更引湖間心

同李三月夜作

霜風驚度鴈月露皓踈林處處砧聲發星河秋夜深

送裴陟歸常州

歸
夜雨須停棹秋風暗入衣見君常北望何事却南

六言

懷靈一上人

江上年年春早津頭日日人行借問山陰遠近猶
聞薄暮鍾聲

奉寄皇甫補闕

京口情人別久揚州估客來踈潮至潯陽來去相
思無處通書

送鄭二之茅山

水流絕澗終日草長深山暮春犬吠雞鳴幾處條
桑種杏何人

問李二司直所居雲山

門外流水何處天邊樹遶誰家山色東西多少朝
朝幾度雲遮

閒居

桃紅復含宿雨柳綠更帶春煙花落家童未掃鶯
啼山客猶眠

七言絕句

臨平道中贈同舟人

遠山誰辯江南北長路空隨樹淺深流蕩飄颻此
何極唯應行客共知心

舟中送李八

詞客金門未有媒遊吳適越任舟迴遠水迢迢分
首去天邊山色待人來

少室韋鍊師昇仙歌

紅霞紫氣晝氤氳絳節青幢迎少君忽從林下昇
天去空使時人禮白雲

送裴闡

道向毘陵豈是歸客中誰與換春衣今夜孤舟行

近遠紫荆零雨正霏霏

秋夜戲題劉方平壁

鴻悲月白時將謝正可招尋惜遙夜翠帳蘭房曲
且深寧知戶外清霜下

重陽日酬李觀

不見白衣來送酒但令黃菊自開花愁看日晚良
辰過步步行尋陶令家

寄權器

露濕青蕪時欲晚水流黃葉意無窮節近重陽念
歸否眼前籬菊帶秋風

送陸澧郭郎

纔見吳洲百草春已聞燕鴈一聲新
秋風何處催年急偏逐山行水宿人

寄振上人無礙寺所居

戀親時見在人群多在東山就白雲
獨坐焚香誦經處深山古寺雪紛紛

酬張繼并序

懿孫余之舊好祇役武昌以六言詩見懷
余以七言裁荅蓋拙於事者繁而費

悵望南徐登北固迢遙西塞恨東關
落日臨川問

音信寒潮唯帶夕陽還

送陸潛夫得雲字

何事千年遇聖君坐令雙鬢老如雲
南行更入山深淺岐路悠悠水自分

題蔣道士房

軒窓縹緲起煙霞誦訣存思白日斜
聞道崑崙有仙籍何時青鳥送丹砂

送雲陽少府

渭田春光無遠近池陽谷口倍芳菲
官舍村橋來幾日殘花寥落待君歸

曾山送別

淒淒遊子若飄蓬
明月清罇抵暫同
南望千山如黛色
愁君客路在其中

赴李少府莊失路

君家南郭白雲連
正待情人弄石泉
月照煙花迷客路
蒼蒼何處是伊川

送謝十二判官

四牡驅馳千里餘
越山稠疊海林踈
不辭終日離家遠
應爲劉家一紙書

同李萬晚望南岳寺懷普門上人

釋子身心無垢紛
獨將衣鉢去人群
相思晚日松林寺
唯有鍾聲出白雲

送魏十六還蘇州

秋夜沉沉此送君
陰蟲切切不堪聞
歸舟明日昆陵道
迴首姑蘇是白雲

皇甫冉集卷下終

